

Aðalfundur Menningarráðs Norðurlands vestra fyrir árið 2013

haldinn í Félagsheimilinu á Hvammstanga, fimmtudaginn 16. október 2014, kl. 09.00.

Mættir voru 22 kjörgengir fulltrúar. Fundurinn telst löglegur þar sem löglega var til hans boðað skv. samþykktum Menningarráðs Norðurlands vestra.

Formaður, Björg Baldursdóttir, setti fund og bauð þingfulltrúa velkomna. Tilnefndi hún Júlíus Daða Antonsson fundarstjóra og Hildi Þóru Magnúsdóttur fundarritara. Tillagan var samþykkt samhljóða. Fundarstjóri tók því næst við fundarstjórn og gengið var til dagskrár.

1. Skýrsla um starfsárið 2013

Björg Baldursdóttir formaður flutti skýrslu stjórnar. Skýrslan er aðgengileg í heild sinni í ársskýrslu SSNV 2013. Björg þakkaði samnefndarfólki sínu og menningarfulltrúa gott samstarf en kosið verður í nýtt menningarráð á ársþingi SSNV á morgun, 17. okt. 2014.

2. Ársreikningur menningarráðs fyrir árið 2013

Ingibergur Guðmundsson menningarfulltrúi skýrði ársreikning ráðsins fyrir árið 2013. Rekstrartekjur námu 41.370.000 kr. Rekstrargjöld námu 41.714.935 kr. Fjármagnstekjur umfram fjármagnsgjöld voru 471.251 kr. Rekstrarhagnaður í heild var því 126.316 kr. Af úthlutuðum styrkjum fóru alls 22.100.000 kr. í verkefna styrki og 10.300.000 kr. í stofn- og rekstrarstyrki.

3. Fjárhagsáætlun fyrir árið 2015

Ingibergur lagði fram tillögu að fjárhagsáætlun fyrir árið 2015. Tekjur eru áætlaðar 38.011.000 kr. Af gjöldum er gert ráð fyrir að 24.000.000 kr. fari í verkefnastyrki, 12.000.000 kr. fari í stofn- og rekstrarstyrki.

Ingibergur sagði frá skipulagsbreytingu sem orðið hefur á árinu þar sem menningarfulltrúi var ráðinn í fullt starf sem atvinnuráðgjafi SSNV en með sérhæfingu á sviði menningarmála. Munu því laun menningarfulltrúa færast alfarið yfir til SSNV atvinnuráðgjafar og lækkar því launakostnaður menningarráðs sem því nemur. Því aðeins gert ráð fyrir að 1.785.000 kr. fari í rekstur.

4. Umræður um ársskýrslu –ársreikninga og fjárhagsáætlun

Þóra Sverrisdóttir tók til máls og lagði áherslu á mikilvægi þeirra fjármuna sem fara í menningarstarf og þakkaði menningarráði fyrir góð störf.

Því næst vísaði fundarstjóri ársreikningum menningarráðs og fjárhagsáætlun fyrir árið 2015 til umfjöllunar í fjárhags- og laganefnd ársþings SSNV.

5. Ákvörðun um þóknun til fulltrúa í menningarráðinu fyrir árið 2015

Formaður lagði til að þóknun til fulltrúa í menningarráði fyrir árið 2015 yrði 15.000 kr. pr. setinn fund fyrir almenna fulltrúa og 22.500 kr. fyrir formann.

Tillögunni var vísað til umfjöllunar í fjárhags- og laganefnd ársþings SSNV.

6. Önnur mál

Ingibergur Guðmundsson tók til máls og flutti tillögu um endurskoðun á samþykktum menningarráðs.

Tillaga um endurskoðun á samþykktum Menningarráðs Norðurlands vestra

Aðalfundur Menningarráðs Norðurlands vestra, haldinn á Hvammstanga 16. okt. 2014, samþykkir að fela Menningarráði Norðurlands vestra að endurskoða samþykktir fyrir menningarráðið og leggja breytingatillögur fyrir næsta aðalfund menningarráðs, árið 2015. Skulu breytingatillögur ráðsins liggja fyrir 15. ágúst 2015.

Greinargerð:

Núverandi samþykktir fyrir Menningarráð Norðurlands vestra eru frá árinu 2007. Frá þeim tíma hafa orðið töluverðar breytingar á framkvæmd mála, m.a. er í tillögum að sóknaráætlun fyrir Norðurland vestra, 2015-2019, gert ráð fyrir að umsóknar- og úthlutunarferli fjármuna til menningarstarfsemi færist frá menningarráðinu. Þá hefur vægi aðalfundar ráðsins breyst og færst að hluta yfir til ársþings SSNV. Einnig þarf að skoða fleiri þætti í starfsemi ráðsins, s.s. hvort það verði rekið áfram á sérstakri kennitölu.

Í ljósi ofangreindra þátta er nauðsynlegt að endurskoða samþykktir ráðsins en þeim verður aðeins breytt á aðalfundi.

Fundarstjóri vísaði því næst tillögunni til umfjöllunar í fjárhags- og laganefnd ársþings SSNV.

Ályktun um framtíð menningarsamninga

Ingibergur Guðmundsson kynnti sameiginlega ályktun menningarfulltrúa landshlutanna sem samþykkt var á fundi þeirra á Eyrarbakka 9. okt. sl.:

Framtíð menningarsamninga

Segja má með sanni að almenn sátt ríki um menningarsamningana og framkvæmd þeirra, bæði þegar litið er til viðhorfa sveitarfélaga, starfandi listamanna og menningarstofnana. Um það vitna úttektir sem gerðar hafa verið á menningarsamningunum og umsagnir og ályktanir landshlutasamtaka.

Reynslan af starfsemi menningarráðanna á landsbyggðinni hefur verið góð og þau hafa reynst öflugur bakhjarl fyrir menningarstarfsemi, eftt starfandi listamenn og menningarstofnanir og stuðlað að auknu samstarfi og fagmennsku. Starf menningarráðanna hefur einnig verið í góðu samræmi við menningarstefnu ríkisins.

Nú þegar breytingar standa fyrir dyrum varðandi samning ríkis og sveitarfélaga um stuðning við menningarmál er áriðandi að tryggja að þær verði til þess að efla og styrkja menningarstarf á landsbyggðinni. Samfella þarf að vera í stuðningi við menningarstofnanir og verkefni en mörg verkefni á landsbyggðinni eru mjög aðþrengd eftir niðurskurð á fjárframlögum á síðustu árum. Frekari niðurskurður er ekki valkostur og ekki heldur sú stöðnun og jafnvel afturför sem blasir við ef miðað verður við óbreytt framlög til málaflokksins.

Í væntanlegum samningi þarf að tryggja aukin framlög ríkis og sveitarfélaga til menningarmála, bæði hvað varðar verkefnastyrki og rekstrar- og stofnstyrki. Jafnframt verður fagmennska að vera höfð að leiðarljósi við framkvæmd þess samnings sem gerður verður og hlutverk menningarráða landshlutanna má ekki vanmeta í því samhengi.

Fleira ekki tekið fyrir. Fundi slitið kl. 09:47.

Hildur Þóra Magnúsdóttir fundarritari